

(四縣腔)

編號 03 號

【無共樣个粽子】黃美貞原作

粽子在臺灣係當平常个點心，閒時間節想食粽子就買得著。毋過，五月節該下，大家一定會特別綳粽子，無就去店頭買欸兩環粽子過願¹合過節。

自係知人我，屋下个粽子就係自家綳个，阿姆講：「細妹嫁人做心白，打板綳粽愛學拏。」茼蒿葉²係客家人好用个粽葉，綳鹹粽前半隻月，就愛去山頂、河壩脣，擇較貴較大皮个葉仔，為著粽葉走去山頂兩三轉，係極平常个事情。風吹雨涿个茼蒿葉，異多塵灰會黏在葉仔頂，愛用老菜瓜布定定仔搓，搓淨正好放在大鑊爌，爌分佢軟又出味，講實在話，單淨準備粽葉就無恁該哦！

阿爸長透講：「鹹粽个米盡要緊，毋驚粒就驚綿。」阿姆一直堅持米愛用鑊頭定定仔爌，雖然背尾有電鑊仔做得蒸米，乜毋當阿哥一句：「用炒个米較好食！」香料毋使多就愛焠³來香，轉色个蘿蔔乾、簡單个豆腐乾、三層腩个烏豬肉，還有細蕊个鈕仔菇，害佢㗎起勢綳，就試著肚當飢。阿姆打早趺床，無閒泊杈⁴到

半下晝，綳好粽子堵好赴食夜，連第二日个便當就係清香个茼蒿粽。

背尾去南部讀書，共宿舍个同學知佢無轉屋過節，總係會帶加幾隻仔粽子分佢食，佢講：「南部粽係包生米去爌，愛爌畀酪酪，中央个三層肉，一入嘴就會化忒。」還有同學請佢食「菜粽」，裡肚無包菜，顛倒係異多番豆，搵特製个甜醬，緊噉就緊香。無論北部粽、南部粽還係菜粽，佢都準飯食，過一個五月節，輒常食忒十過隻粽子，該載⁵胃腸消化好，毋識有飽脹个症頭，大家說佢有食祿⁶。

記得有一年个五月節，佢在外國讀書，同鄉湊等去華人超市買粽葉、糴糯米，共下過節打鬥敘，每一儕都認真去想阿姆綳个粽子，有麼个好料仔，有人講：「鹹卵黃！」有人講：「魷魚仔！」大家你一句，佢一句，歸日仔話無停，講自家屋下个粽子一等好食，結果香料放到淦淦淦，刻耐仔用粽葉包起來又綳毋核，將就解開來。粽葉攤在鑊底，糯飯同香料放在粽葉頂，包尾用粽葉弇等，蒸成十分鐘仔，無想著這隻大鑊粽恁錫人，好食到連舌嫲就會吞落去。

嫁來臺北十過年，食過个粽子既經毋知有幾多，一直到今，佢還係試著茼蒿粽盡好食，該種特殊个香氣，就係阿姆个味緒，食過就會尋尾⁷，係一種放在心肝肚个感動。

¹ 過願：音 go ngien；過癮。

² 茼蒿葉：音 gieu` giong` iab；月桃葉。

³ 焠：音 biag；乾煎。

⁴ 無閒泊杈：音 mo` han` qi ca；形容非常忙碌的樣子。

⁵ 該載：音 goi` zai；幸虧、還好。

⁶ 有食祿：音 iu` siid lug`；有享用美味食物的福氣。

⁷ 尋尾：音 qim` mi`；意猶未盡。